


E bida, carera, lucha y morto di un gran Arubiano



ORANJESTAD - Gilberto Francois Croes a nace dia 25 di januari 1938 di 'Mimita' y 'Panchico' Croes na Santa Cruz #124. Un dia 18 di December di 1962 el a drenta enlace matrimonial cu Glenda



Croes, union for di cual a nace cuater yiu Glenbert, Guisette, Gilberto Junior y Glendeline. Mayoria di nan bida, e famia aki a biba na un cas na Cumana. Su yiunan semper a comparti bon recuerdonan di nan Tata y con e tabata haci un esfuerzo pa pasa tempo cu

nan, a pesar di su tantisimo responsabilidad. Awendia e famia a sigui crece y e di tres generacion di famia di Betico Croes ta conta cu cuater nieto.

Awendia nos conoci como hopi cos, entre nan nos libertador; pero e studiantenan di bario di Santa Cruz tabatin e oportunidad di biba cune den klas como docente. E hoben Betico a atende scol secundario of manera tabata ser yama e tempo ey, Hogere Burger School na St. Dominicus College entre 1944 y 1954 y despues a drenta un Kweekschool na Hulanda di unda el a gradua na 1959. Inmediatamente el a cuminsa traha na St. Jozefschool cu awe ta Colegio San Hose for di 1959 pa 1967 y na St. Antonius College di 1967 pa 1971, ambos na Santa Cruz. Fuera di su Hoofdakte como maestro, Betico a specializa dor di obtene L.O. den Spaans y den Handel.

E carera politico a cuminsa na 1967 ora cu partido AVP

reconociendo e potencial di e hoben aki, a pidi Betico pa reenforza nan lista pa e eleccion di e aña ey. Den su debut como politico Betico a figura como candidato number cinco.

Despues di un entrada triunfal den arena politico, te na ultimo momento Betico a keda miembro di Eilandsraad di Aruba y te cu algun luna prome cu su morto, miembro di Parlamento di Aruba. Na

mesun momento e tabata miembro di Staten di Antias Hulandes for di 1973 den representacion di partido cu mas lat el a lanta, esta MEP. Durante un tempo corto Betico tabata presidente di Staten di Antias Hulandes. Entre 1967 y 1970 Betico a fungi como diputado di enseñanza, asuntunan general y personal, registro civil y biblioteca publico.

Despues di un confronta diferencianan di idealismo cu partido AVP, Betico a

lanta su mesun partido dia 9 di februari 1971 cu e nomber di Movimiento Electoral di Pueblo, MEP, hunto cu algun amigo. E mesun aña Betico a forma parti di e Comision di Reina luchando pa Aruba haya su Status Aparte.

Un di e puntonan resaltante y cu ta bale la pena menciona,

ta por ehempel e hecho cu na juli 1979 Betico a hiba e partido na un victoria aplastante cu 9.419 voto.

Den su trayectoria como diputado, parlamentario y en general, lider politico, loke ta considera e logro di mas grandi ta e aprobacion di e mocion pa Aruba haya su Status Aparte ta keda

concreta dia 12 di maart 1983 na momento cu Hulanda y Antias a acepta e Status Aparte y mas lat na Mei 1985 Parlamento Hulandes ta acepto cambio di Statuut 31 di December di mesun aña Staten di Antias ta firma e ultimo leynan preparatorio.

A pesar di a expresa su deseo di descansa di e actividadnan como mandatario y politico y te hasta di incursiona den profesion di periodismo, lo tabata algo dificil pa bandona e labor cu, cu



Continua D/15

Januari 25

e dia cu nos
ta recorda natalicio
di Betico Croes,

su lucha...
su ideanan...
su logronan...
su liderazgo...

Compra



Continuacion di D/11

tanto pasion el a desempeña. Sigur e presion di deseo di su pueblo lo a pone continua y tambe sigui domina den e tereno aki.

Dia 31 di december 1985, despues di realiza cu e no lo carga responsabilidad gubernamental den e structura nobo, Betico a cuminsa prepara pa un descanso y preocupa su mes un tiki mas di salud. Toch e ta dicidi cu e lo atende e ceremonianandicelebracion di Status Aparte.

Prome cu el a bai ceremonia, e ta bishita su mama y ta brasa e bisando cu e lo no bolbe. Su mama ta kere cu e kier men cu e lo bolbe mas pa e anochi ey, pero sin sa cu en berdad su yiu no lo bolbe nunca mas. Na caminda pa e ceremonia Betico ta haya un accident cu su auto na altura di Hooiberg. Den un situacion hopi grave Betico ta yega Hospital. Despues di un par di dia ta transporta e pa Miami. Continuamente tin atardi di oracion na Aruba cu e speranza cu Betico lo sali for di e coma cu el a cai aden.

Un biaha mas ta transporta Betico, e biaha aki pa un hospital na Chicago y un ultimo biaha pa Utrecht na Hulanda. A pesar cu inicialmente tabata drenta noticianan positivo, dia 25 di november 1986 Betico a fayece, diesun luna despues di su accident. Esnan cu tabata cune te na ultimo momento a describi cu el a fayece na un manera trankil y cu un sonrisa riba su cara, pero lamentablemente leu for di su isla.

Betico a wordo dera den Santana Catolico di Santa Cruz caminda tur aña, riba fecha di su nacemento, famia y amigonan ta recorda su memoria y pone ofrendanan floral.

Despues di su fayecimento, Betico a keda ricibi reconocemento ora cu na Mei 1998 a otorga na su persona e titulo di 'Libertador' y na December

1999 a reconoce como 'Personahe di Siglo 20'.

Tur su famia, tur esnan cu a conoce of cu a comparti cune maske ta un instante por duna fe cu Betico Croes tabata un lider innato, un persona cu a nace cu e don di atrae hende danki na su carisma. For di realza Europeo te na mandatarionan di nos region y for di empresarionan te na e Arubiano di mas humilde, Betico tabata sa con pa trata hende y mas ainda, con pa hiba su mensahe dilanti ganando asina e apoyo di un y tur. Como hende e tabatin e ingredientenan necesario pa ta un lider grandi y solamente por imagina con leu e lo por a yega si e lo tabata na bida ainda.

Apesar di su diferente responsabilidad como maestro, yiu, casa y tata di famia y mas laat un di e miho politiconan di Aruba, Betico Croes a sa



di mantene e aspecto social di su bida dor di participa den diferente deporte y hobby.

Betico tabata activo den Aruba Table Tennis Association, Aruba Sport Unie, Estrella Musical y tambe Consejo Parokial Santa Cruz, pa loke ta trata e aspecto religioso. Semper e tabata presente na reunionnan festivo di famia y tabata probecha e

ocasionnan aki pa comparti tempo di calidad cu su yiunan, pero tambe otro miembronan di famia manera tanta y omo, primonan y demas. Betico tabata toca acordeon hunto cu su famianan, entre otro su ruman homber Aiky y su swa Maiky, tur hibando un dande na cas di famia. For di e tempo ey caba, e agrupacion aki tabata conoci como 'Grupo di Betico'.



*Pueblo hisa boso bandera
mañan riba fecha di
nacemento di e gran lider
Betico Croes
y muestra cu su lucha
pa nos gran Pais no
tabata en vano!!!*

***Felis**
Dia di **Betico***

